

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

467 Маҳаллий давлат ҳокимияти органлари томонидан айрим тоифадаги юридик шахсларга мол-мулк солиғи, ер солиғи, ягона ер солиғи ҳамда ободонлаштириш ва ижтимоий инфратузилмани ривожлантириш солиғи бўйича имтиёзлар бериш тартиби тўғрисидаги низомни тасдиқлаш ҳақида

Ўзбекистон Республикаси Солиқ кодексининг 30-моддасини амалга ошириш мақсадида Вазирлар Маҳкамаси **қарор қилади:**

1. Маҳаллий давлат ҳокимияти органлари томонидан айрим тоифадаги юридик шахсларга мол-мулк солиғи, ер солиғи, ягона ер солиғи ҳамда ободонлаштириш ва ижтимоий инфратузилмани ривожлантириш солиғи бўйича имтиёзлар бериш тартиби тўғрисидаги низом иловага мувофиқ тасдиқлансин.

2. Вазирликлар ва идоралар, маҳаллий давлат ҳокимияти органлари бир ой муддатда ўз идоравий норматив-ҳуқуқий ҳужжатларини ушбу қарорга мувофиқлаштирсинлар.

3. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари Р.С. Азимов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2012 йил 2 октябрь,
281-сон

Вазирлар Маҳкамасининг
2012 йил 2 октябрдаги 281-сон қарорига
ИЛОВА

**Маҳаллий давлат ҳокимияти органлари томонидан айрим тоифадаги юридик шахсларга мол-мулк солиғи, ер солиғи, ягона ер солиғи ҳамда ободонлаштириш ва ижтимоий инфратузилмани ривожлантириш солиғи бўйича имтиёзлар бериш тартиби тўғрисида
НИЗОМ**

I. Умумий қоидалар

1. Ушбу Низом Ўзбекистон Республикаси Солиқ кодексининг 30-моддасига ва «Маҳаллий давлат ҳокимияти тўғрисида»ги Ўзбекистон Республикаси Қонунига мувофиқ маҳаллий давлат ҳокимияти органлари томонидан айрим тоифадаги юридик шахсларга мол-мулк солиғи, ер солиғи, ягона ер солиғи ҳамда ободонлаштириш ва ижтимоий инфратузилмани ривожлантириш солиғи бўйича имтиёзлар бериш тартибини белгилайди.

2. Маҳаллий давлат ҳокимияти органлари мол-мулк солиғи, ер солиғи, ягона ер солиғи ҳамда ободонлаштириш ва ижтимоий инфратузилмани ривожлантириш солиғи бўйича имтиёзларни (кейинги ўринларда солиқлар бўйича имтиёзлар деб аталади) солиқлардан тўлиқ ёки қисман озод қилиш тарзида беришлари мумкин.

3. Солиқлар бўйича имтиёзлар қуйидаги ҳолларда берилади, агар:

тегишли ҳудуднинг бюджети юқори турувчи бюджетдан дотация олмаганда ва солиқлар бўйича имтиёзлар бериш тегишли бюджетнинг дотация олишига сабаб бўлмаганда;

тегишли ҳудуднинг маҳаллий бюджети харажатлари, шунингдек Ўзбекистон Республикаси Президентининг ёки Ўзбекистон Республикаси Ҳукуматининг алоҳида қарорларида назарда тутилган тадбирлар молиялаштирилиши тўлиқ таъминланганда;

муайян солиқ бўйича имтиёзлар бериш натижасида тегишли бюджетга тушум тушмаслиги мумкин бўлган даромадлар (йўқотишлар) суммаси бошқа манбалар бўйича қўшимча тушумлар ҳисобига қопланганда;

мол-мулк солиғи, ер солиғи, ягона ер солиғи бўйича имтиёзлар берилган объектлар кўчмас мулкка бўлган ҳуқуқларни давлат рўйхатидан ўтказувчи органларда ҳамда ер участкасига бўлган ҳуқуқни тасдиқловчи ҳужжатларда кўрсатилган ер участкалари майдони доирасида белгиланган тартибда рўйхатдан ўтказилганда;

солиқ тўловчида бюджетга ва давлат мақсадли жамғармаларига тўловлар бўйича қарздорлик мавжуд бўлмаганда.

4. Солиқлар бўйича имтиёзлар биринчи навбатда қуйидаги тоифадаги солиқ тўловчиларга берилади:

а) ишлаб чиқаришни модернизациялаш, техник ва технологик жиҳатдан қайта жиҳозлашни амалга ошираётганларга;

б) Ўзбекистон Республикаси Инвестиция дастурига ёки ҳудудий инвестиция дастурларига киритилганларга;

в) ҳудуднинг инфратузилмасини ривожлантиришда қатнашувчиларга.

5. Солиқлар бўйича имтиёзлар солиқнинг битта тури бўйича, шунингдек бир нечта тури бўйича бир йўла берилиши мумкин. Солиқ бўйича имтиёзлар дастлаб 12 ойгача бўлган муддатга берилади. Бунда тегишли ҳудудий молия органларининг, давлат солиқ хизмати органларининг, иқтисодиёт ва адлия органларининг ҳулосасига кўра солиқлар бўйича имтиёзларнинг амал қилиши 12 ойгача бўлган муддатга узайтирилиши мумкин. Кейинчалик ушбу тоифадаги солиқ тўловчиларга солиқ бўйича имтиёз камида беш йил ўтгандан кейин берилиши мумкин.

6. Солиқлар бўйича имтиёзлар берилиши муносабати билан бўшайдиган маблағлар юридик шахслар томонидан ишлаб чиқариш ҳажмларини кўпайтириш, ишлаб чиқарилаётган маҳсулотлар (ишлар, хизматлар)нинг турларини кенгайтириш ва рақобатбардошлигини ошириш билан боғлиқ тадбирларга йўналтирилади.

Солиқлар бўйича имтиёзлар берилиши натижасида бўшайдиган маблағлардан белгиланган мақсадда фойдаланилмаган тақдирда, ушбу маблағлар тўлиқ ҳажмда, белгиланган тартибда пеня ҳисоблаган ҳолда тегишли маҳаллий бюджетга ундирилади.

7. Солиқлар бўйича имтиёзларни расмийлаштириш ва бухгалтерия ҳисобида акс эттириш тартиби қонун ҳужжатларига мувофиқ амалга оширилади.

II. Маҳаллий давлат ҳокимияти органлари томонидан солиқлар бўйича имтиёзлар бериш тартиби

8. Солиқлар бўйича имтиёзларни бериш Қорақалпоғистон Республикаси Жўқорғи Кенгеси, халқ депутатлари вилоят, туман ва шаҳар Кенгашининг тегишли қарорлари асосида ҳамда ушбу Низомга иловадаги схема бўйича амалга оширилади.

9. Халқ депутатлари туман ва шаҳар Кенгашининг солиқлар бўйича имтиёзлар бериш тўғрисидаги қарорлари лойиҳалари тегишли равишда Қорақалпоғистон Республикаси Вазирлар Кенгашининг Раиси, вилоятлар ва Тошкент шаҳар ҳокимлари билан мажбурий тартибда келишилиши лозим.

10. Қорақалпоғистон Республикаси Жўқорғи Кенгесининг, халқ депутатлари вилоят, туман ва шаҳар Кенгашининг солиқлар бўйича имтиёзлар бериш тўғрисидаги қарорлари лойиҳалари (кейинги ўринларда солиқлар бўйича имтиёзлар бериш тўғрисидаги қарорлар лойиҳаси деб аталади) тегишли равишда Қорақалпоғистон Республикаси Вазирлар Кенгаши, вилоятлар, туманлар ва шаҳарлар ҳокимликлари томонидан тайёрланади.

Солиқ тўловчиларнинг мурожаатлари ёки Қорақалпоғистон Республикаси Жўқорғи Кенгеси, халқ депутатлари вилоят, туман ва шаҳар Кенгаши депутатларининг таклифлари қарорлар лойиҳасини тайёрлаш учун асос ҳисобланади.

11. Солиқлар бўйича имтиёзлар бериш тўғрисида ишлаб чиқилган қарорлар лойиҳалари тегишли ҳудудий молия органлари, давлат солиқ хизмати органлари, иқтисодиёт ва адлия органлари билан келишилади.

Бунда юқорида кўрсатилган органлар солиқлар бўйича имтиёзлар бериш тўғрисидаги қарор лойиҳаси тақдим этилган кундан бошлаб ўттиз кун муддатда ушбу лойиҳа бўйича:

молия ва солиқ органлари — тегишли бюджетнинг олинмай қоладиган даромадларини ҳамда солиқлар бўйича берилаётган имтиёзларни кутилаётган харажатлар билан таққослаган ҳолда маҳаллий бюджет даромадларига кутилаётган таъсирини баҳолаш юзасидан;

иқтисодиёт органлари — солиқлар бўйича имтиёзлар беришнинг ҳудуд иқтисодиётига таъсири тўғрисида;

адлия органлари — солиқлар бўйича имтиёзлар бериш тўғрисидаги қарорлар лойиҳаларини юридик экспертизадан ўтказиш натижалари бўйича тегишли хулосалар тақдим этадилар.

12. Солиқлар бўйича имтиёзлар бериш тўғрисидаги қарорлар лойиҳаларида куйидагилар мажбурий тартибда кўрсатилади:

- а) солиқлар бўйича имтиёз берилаётган юридик шахсларнинг тоифаси;
- б) имтиёз берилаётган солиқ тури;
- в) солиқлар бўйича имтиёз берилаётган муддат;
- г) солиқ солишдан бўшайдиган маблағларнинг мақсадли йўналтирилиши.

13. Солиқлар бўйича имтиёзлар бериш тўғрисидаги келишилган қарорлар лойиҳалари Қорақалпоғистон Республикаси Жўқорғи Кенгесига, халқ депутатлари вилоят, туман ва шаҳар Кенгашига кўриб чиқиш учун куйидаги материаллар илова қилинган ҳолда киритилади:

тегишли равишда Қорақалпоғистон Республикаси Вазирлар Кенгаши Раисининг, вилоят, туман ва шаҳар ҳокимининг ўринбосари имзолаган солиқлар бўйича имтиёзлар бериш мақсадга мувофиқлигини асословчи тушунтириш хати;

солиқлар бўйича имтиёзлар беришнинг ҳудуд иқтисодиёти учун оқибатларини баҳолаган ҳолда зарур ҳисоб-китоблар ва кўриб чиқиш материаллари, шу жумладан солиқлар бўйича берилаётган имтиёзларнинг маҳаллий бюджет даромадлари тушишига таъсири, шунингдек уларга солиқ имтиёзларининг бюджет ва ижтимоий самарадорлигини асословчи ҳисоб-китоблар илова қилинади.

14. Солиқлар бўйича имтиёзлар бериш ва уларнинг амал қилиш муддатини узайтириш тўғрисидаги қарорлар Қорақалпоғистон Республикаси Жўқорғи Кенгесининг, халқ депутатлари вилоят, туман ва шаҳар Кенгашининг раиси томонидан имзоланади.

15. Солиқлар бўйича имтиёзлар бериш тўғрисидаги қарор у қабул қилинган ойдан кейинги ойнинг 1-кунидан бошлаб кучга киради.

**III. Маҳаллий давлат ҳокимияти органларининг
жавобгарлиги ва давлат солиқ хизмати органларининг
назорати**

16. Маҳаллий давлат ҳокимияти органлари ушбу Низом талабларига риоя этилиши юзасидан жавоб берадилар.

17. Солиқлар бўйича имтиёзларни қўлланишнинг тўғрилигини ва имтиёзларнинг берилиши муносабати билан бўшайдиган маблағлардан мақсадли фойдаланилишини назорат қилиш, қонун ҳужжатларига мувофиқ, давлат солиқ хизмати органлари томонидан амалга оширилади.

18. Давлат солиқ хизмати ҳудудий органлари тақдим этилган ҳисоб-китоблар асосида, ушбу Низомга мувофиқ солиқлар бўйича имтиёзлар берилган солиқ тўловчиларнинг Йиғма реестрини юритадилар.

19. Ўзбекистон Республикаси Давлат солиқ қўмитаси давлат солиқ хизмати қўйи органларининг маълумотлари асосида, солиқлар бўйича имтиёзлар берилган солиқ тўловчиларнинг Йиғма реестрини юритади ва ҳар йили уни ҳисобот йилидан кейинги йилнинг 15 апрелигача бўлган муддатда Ўзбекистон Республикаси Молия вазирлигига тақдим этади.

Низомга
ИЛОВА

**Маҳаллий давлат ҳокимияти органлари томонидан
солиқлар бўйича имтиёзлар бериш тартиби
СХЕМАСИ**

